

禽虫典

禽蟲典第一百四卷

驢部彙考

釋名

衛爾雅翼

褐驢 本草綱目

黑驢 本草綱目

白驢 本草綱目

野驢 本草綱目

山驢 本草綱目

海驢 本草綱目

驢圖



齊民要術 治驢漏蹄方

鑿厚磚石令容驢蹄深二寸許火燒磚令熱赤削驢蹄令出漏孔以蹄頓著磚孔中傾鹽酒醋令沸浸之牢捉勿令脚動待磚冷然後放之卽愈入水遠行悉不發

爾雅翼 驢

驢似馬而長耳其庸

恐作色

褐不甚駭異九懷云驢垂兩耳中坡蹉蹉蹇驢服駕無用日多驢既低小

而不甚駿故稱蹇焉則爲無用甚矣一名爲衛或曰晉衛玠好乘之故以爲名始自漢靈帝於宮中西園駕四白驢躬自操轡驅馳周旋以爲樂於是公卿貴戚轉相放效里乘輜輶以爲騎從互相侵奪價與馬齊說者以爲驢遲鈍之畜至達上下山谷野之所用耳何有帝王君子而驂服之乎是胡服之妖也性能旋磨及馱負故袁淑九錫云負磨迴衡迅若轉電是也率以午及五更初而鳴說者云音隨時興晨夜不默仰契元象俯協漏刻應更長鳴毫分不忒是其事也其聲醜惡乃獨有好之者王粲好驢鳴魏文帝臨其喪使赴客皆作驢鳴又晉王濟好之孫楚哭之爲之作聲而形體皆似人之嗜好不同有如此者或所無處其鳴亦能駭虎顧久習其技則殺之矣其子按說文別名騾

本草綱目 釋名

李時珍曰驢臚也臚腹前也馬力在膊驢力在臚也

集解

李時珍曰驢長頰廣額磔耳修尾夜鳴應更性善馱負有褐黑白三色入藥以黑者爲良女直遼東出野驢似驢而色駁鬃尾長骨格大食之功與驢同西土出山驢有角如羚羊詳羚羊下東海島中出海驢能入水不濡又有海馬海牛海豬海獐等物其皮皆供用陳藏器曰海驢海馬皮毛在陸地皆候風潮則毛起物性如此

肉氣味

甘涼無毒 孫思邈曰酸平吳瑞曰食驢肉飲荊芥茶殺人妊婦食之難產同鳧茈食令人筋急病死者有毒

主治

日華曰解心煩止風狂釀酒治一切風孟詵曰主風狂憂愁不樂能安心氣同五味煮食或以汁作

粥食 李時珍曰補血益氣治連年勞損煮汁空心飲療痔引蟲正要曰野驢肉功同

發明

寇宗奭曰驢肉食之動風脂肥尤甚屢試屢驗日華以爲止一切風狂未可憑也

頭肉主治

孟詵曰煮汁服二三升治多年消渴無不瘥者又以漬麴醞酒服去大風動搖不伏者日華曰亦洗頭風風屑李時珍曰同薑薑煮汁日服治黃疸百藥不治者出張文仲方

脂主治

日華曰敷惡瘡疥癬及風腫孟詵曰和酒服三升治狂癪不能語不識人和烏梅爲丸治多年瘡未發時服二十丸又生脂和生椒搗熟綿裹塞耳治積年聾疾李時珍曰和酒等分服治卒欬嗽和鹽塗身體手足風腫

髓氣味

甘溫無毒

主治

李時珍曰耳聾

血

李時珍曰熱血以麻油一盞和攪去沫煮熟卽成白色此亦可異昔無言及者

氣味

鹹涼無毒

主治

李時珍曰利大小腸潤燥結下熱氣

乳氣味

甘冷利無毒

孫思邈曰酸寒唐本曰小兒熱急黃多服使利孫思邈曰療大熱止消渴蕭炳曰

小兒熱急驚邪赤痢日華曰小兒痢疾客忤天弔風疾孟詵曰卒心痛連腰膺者熱服三升陳藏器曰蜘蛛咬瘡器盛浸之蚰蜒及飛蟲入耳滴之當化成水李時珍曰頻熱飲治氣鬱解小兒熱毒不

生瘡疹浸黃連取汁點風熱赤眼

陰莖氣味

甘溫無毒

主治

李時珍曰強陰壯筋

駒衣主治

外臺曰斷酒煨研酒服方寸匕

皮主治

孟詵曰煎膠食之治一切風毒骨節痛呻吟不止和酒服更良日華曰膠食主鼻衄吐血腸風血痢崩中帶下其生皮覆瘡疾人良

毛主治

孟詵曰骨頭中一切風病用一斤炒黃投一斗酒中漬三日空心細飲令醉暖臥取汗明日更飲如

前忌陳倉米麪

骨主治

孟詵曰煮湯浴歷節風李時珍曰牝驢骨煮汁服治多年消渴極效

頭骨主治

李時珍曰燒灰和油塗小兒解顱

懸蹄主治

李時珍曰燒灰傅癰疽散膿水和油傅小兒解顱以瘥爲度

溺氣味

辛寒有小毒

主治

陳藏器曰浸蜘蛛咬瘡夏李時珍曰治反胃噎病狂犬咬傷癰瘍惡瘡並多飲取瘥風蟲牙痛頻含漱之良

發明

朱震亨曰一婦病噎用四物加驢屎與服以防其生蟲數十帖而愈李時珍曰張文仲備急方言幼年患反胃每食羹粥諸物須臾即吐出貞觀中許奉御兄弟及柴蔣諸名醫奉敕調治竟不能療漸疲困候絕旦夕忽一衛士云服驢小便極驗遂服二合後食止吐一半晡時再服二合食粥便定次日奏知則宮中五六人患反胃者同服一時俱瘥此物稍有毒服時不可過多須熱飲之病深者七日當效後用屢驗

屎主治

唐本曰熬之熨風腫漏瘡絞汁主心腹疼痛諸症忤癰癖反胃不止牙齒痛治水腫每服五合良薑體成字者爲燥水用牝驢屎不成字者爲濕水用駁驢屎李時珍曰燒灰吹鼻止衄甚效和油塗惡瘡濕癬

耳垢主治

崔氏曰刮取塗蠅螫

尾軸垢主治

蘇恭曰新久瘡無定期者以水洗汁和麵如彈丸二枚作燒餅未發前食一枚發時食一枚效

溺下泥主治

陳藏器曰傅蜘蛛傷

驢槽主治

陳藏器曰小兒拗哭不止令三姓婦人抱兒臥之移時即止勿令人知

發明

李時珍曰錦囊詩云繫蟹懸門除鬼疾畫驢掛壁止兒啼言關西人以蟹殼懸之辟邪瘧江左人畫倒驢掛之止夜啼與驢槽止哭之義同皆厭穢法耳

附方

中風頭眩心肝浮熱肢軟骨疼語蹇身顫用烏驢頭一枚如食法豉汁煮食

鏡心

滴耳治聾烏驢

脂少許鯽魚膽一箇生油半兩和勻納縷葱管中七日取滴耳中

聖惠方

眼中癰肉驢脂白

鹽等分和勻注兩目皆頭日三次一月瘥

千金方

多年耳聾重者用三兩度初起者一上便效用

驢前脚脛骨打破向日中瀝出髓以瓷合盛收每用絲點少許入耳內側臥候藥行其髓不可多用
以白色者爲上黃色者不堪 又方驢髓以針砂一合水二合浸十日取清水少許和髓攪勻滴

少許入耳中外以方新磚半箇燒赤潑醋鋪磁石末一兩在磚上枕之至晚如此三度卽通

並普濟方

心熱氣痛黑驢乳暖服三合日再服

廣利方

小兒口噤驢乳豬乳各二升煎一升五合服

千金方

重舌出涎方同上

撮口胎風先炙兩乳中三壯後用此方大驗用烏驢乳一合以東引槐枝三

寸長十根火煨一頭出津拭淨浸乳中取乳滴口中甚妙

聖惠方

中風喎僻骨疼煩燥者用烏驢

皮燂毛如常治淨蒸熟入豉汁中和五味煮食

心錢

牛皮風癬生驢皮一塊以朴硝醃過燒灰油

調搽之名一掃光

李樓奇方

小兒客忤剪驢膊上旋毛一彈子以乳汁煎飲

外臺祕要

襁褓中風取

驢背前交脊中毛一拇指大入麝香豆許以乳汁和銅器中慢炒爲末乳汁和灌之

千金方

腎風

下注生瘡用驢蹄二十片燒灰蜜陀僧輕粉各一錢麝香半錢爲末傅之

奇效方

天柱毒瘡生脊

大椎上大如錢赤色出水驢蹄二片胡粉熬一分麝香少許爲末醋和塗之乾則搽之卽愈

聖惠方

飲酒穿腸飲酒過度欲至穿腸者用驢蹄硬處削下以水煮濃汁冷飲之襄州散將樂小蠻得此方

有效

經驗方

鬼瘡不止用白驢蹄剉炒砒霜各二分大黃四兩綠豆三分雄黃一分硃砂半分研

丸梧子大未發平旦冷水服三丸即止七日忌油

時后方

狐尿刺瘡烏驢尿頓熱漬之

千金方

白玷風驢尿薑汁等分和勻頻洗

聖濟錄

耳聾人中白一分乾地龍一條為末以烏驢駒尿一合

和勻瓷器盛之每滴少許入耳

聖惠方

卒心氣痛驢尿絞汁五合熱服即止

時后方

經水不止

及血崩用黑驢屎燒存性研末麪糊丸梧子大每空心黃酒下五七十丸神妙

醫鑑

疔瘡中

風腫痛用驢屎炒熨瘡上五十遍極效

普濟方

小兒眉瘡黑驢屎燒研油調塗立效

聖惠方

攤

緩偏風治攤緩風及諸風手脚不遂腰脚無力者驢皮膠微炙熟先煮葱豉粥一升別又以水一升

煮香豉二合去滓入膠更煮七沸膠烊如錫頓服之乃暖喫葱豉粥如此三四劑即止若冷喫粥令

人嘔逆

廣濟方

肺風喘促涎潮眼竄用透明阿膠切炒以紫蘇烏梅肉焙研分水等煎服之

直指方

老人虛秘阿膠炒二錢葱白三根水煎化入蜜二匙溫服 胞轉淋秘阿膠三兩水二升煮七合

溫服

千金方

赤白痢疾黃連阿膠丸治腸胃氣虛冷熱不調下痢赤白裏急後重腹痛小便不利

用阿膠炒過水化成膏一兩黃連三兩茯苓二兩爲末搗丸梧子大每服五十丸粟米湯下日三

方局吐血不止千金翼用阿膠炒二兩蒲黃六合生地黃三升水五升煮三升分服經驗治

大人小兒吐血用阿膠炒蛤粉各一兩辰砂少許爲末藕節搗汁入蜜調服肺損嘔血并開胃

用阿膠炒三錢木香一錢糯米一合半爲末每服一錢百沸湯點服日一普濟大衄不止口耳

俱出用阿膠炙蒲黃半兩每服二錢水一盞生地黃汁一合煎至六分溫服急以帛繫兩乳聖惠

月水不調阿膠一錢蛤粉炒成珠研末熱酒服卽安一方入辰砂末半錢月水不止阿膠炒焦

爲末酒服二錢秘妊娠尿血阿膠炒黃爲末食前粥飲下二錢聖惠妊娠血痢阿膠二兩

酒一升半煮一升頓服妊娠下血不止阿膠三兩炙爲末酒一升半煎化服卽愈又方用

阿膠末二兩生地黃半斤搗汁入清酒二升分三服梅師妊娠胎動刪繁用阿膠炙研二兩香

豉一升葱一斗水三升煮取一升入阿膠化服產寶膠艾湯用阿膠炒熟艾葉二兩葱白一升

水四升煮一升分服產後虛闕阿膠炒枳殼各一兩滑石二錢半爲末蜜丸梧子大每服五十

丸溫水下未通再服和劑久嗽經年阿膠炒人參各二兩爲末每用三錢豉湯一盞入葱白少

許煎服日三次

聖濟總錄

直省志書 登州府

海驢出文登海中狀若驢常以八九月上島產乳其皮制爲兩具水不能潤齊乘云海驢皮今有獲之者淺毛灰白作鱸魚斑

含山縣

驢馬類長耳便于乘騎故驢背可以敲詩其雄者逢五更則嘶叫

驢部藝文一

廬山公九錫文

宋袁淑

若乃三軍陸邁糧運艱難謀臣停算武夫吟歎爾乃長鳴上黨慷慨應官崎嶇千里荷囊致餐用捷大勳歷世不刊斯寶爾之功也音隨時興晨夜不默仰契元象俯協漏刻應更長鳴分毫不忒雖挈壺著稱未足比德斯又爾之智也若乃六合昏晦三晨幽冥猶憶天時用不廢聲斯又爾之明也青脊絳身長頰廣額修尾後垂巨耳雙磔斯又爾之相也嘉麥既熟寶須精麪負磨迴衡迅若轉電惠

我衆庶神祇獲薦斯又爾之能也爾有濟師旅之勳而加之以衆能是用遣中大夫閭丘騶加爾使
銜勒大鳴鴻臚班脚大將軍宮亭侯以揚州之廬江江州之廬陵吳國之桐廬合浦之珠廬封爾爲
廬山公

三戒

唐柳宗元

吾恆惡世之人不知推己之本而乘物以逞或依勢以干非其類出技以怒強竊時以肆暴然卒
迫于禍有客談麋驢鼠三物似其事作三戒

黔無驢有好事者船載以入至則無所置放之山下處見之驢然大物也以爲神蔽林間窺之稍出
近之慙慙然莫相知他日驢一鳴虎大駭遠遁以爲且噬已也甚恐然往來視之覺無異能者益習
其聲又近出前後終不敢搏稍近益狎蕩倚衝冒驢不勝怒蹄之虎因喜計之曰技止此耳跳跟大
嗽斷其喉盡其肉乃去噫形之厖也類有德聲之宏也類有能向不出其技虎雖猛疑畏卒不敢取
今若是焉悲夫

驢部藝文二 詩

小遊仙詩

唐曹唐

沙野先生閉玉虛
焚香夜寫紫微書
供承童子閑無事
教劉瓊花喂白驢

斃驢

李洞

蹇驢秋斃瘞荒田
忍把敲吟舊竹鞭
三尺焦桐背殘月
一條藜杖卓寒煙
通吳白浪寬圍國
倚蜀青山峭入天
如畫海門撐肘望
阿誰家賣釣魚船

陳雲岫愛騎驢

宋牟巘

君不學少陵騎驢京華春
一生旅食長悲辛
又不學浪仙騎驢長安市
淒涼落葉秋風裏
却學雪中騎驢孟浩然
冷溼銀鐙敲吟鞭
梅花溪上日來往
身跡懶散人中仙
有時清霜松下路
松風蕭蕭驢耳豎
據鞍傲兀四無人
牧子騎牛相爾汝
勸君但騎驢行路穩
姑徐徐九折畏途鞭快馬
年來曾覆幾人車

韓陵道中

金王庭筠

石頭磴确兩坡間
不記秋來幾往還
日暮蹇驢鞭不動
天教仔細數前山